

寓  
林  
集  
詩

寓林集詩卷之二

武林黃汝亨貞父著

五言古

焦弱侯先生邀同鄭水部高民部遊

三寺作

嘉石閣

每聞北山佳冥想極窮討欣從道侶招況乃日晴好  
蔥翠開柏徑歷落登閣道霜葉綺相錯靈巖翠互抱  
逗漏窺天容茲勝若天造物遷化不貸心怡理無槁

倏忽曦光馳眺覽悔不早

梅花水

午影移石林下訊梅花水霜風吹枯條古壁臨寒澗  
方池不盈尺聊以停清泚小坐池之幽餘香若來止  
我思梅湖仙願將羅浮徙衆卉難爲芳玄賞未云已

幕府寺

長林薄餘光遐覽還策杖當時幕府山寂寥鳴梵響  
王公安在哉寶公亦云往虛無一參照彷彿存英爽  
大江寒北風古墓堙榛莽代謝理固然嘯歌心所賞

掃石且傾杯直視煙嵐上

杪秋同高民部邀熊侍御遊靈谷寺暢飲竟夕  
陶然有作用東字韻

烏啼忽聞曙林露光濛濛朋來啓雙扉駕言出城東  
驅犢方度阡采樵政披叢延睇陵闕上紫氣鬱以蒙  
擊柝旣振谷鳴騶亦來聽窈窕松中徑謾設松下風  
蒼翠透四野靈秀紛交通古殿迴凌漢高塔遙摩穹  
微矚恣流覽大江渺難窮山骨澄疎碧木葉繁殷紅  
秋色一何豔勝賞寧無同開尊飲美酒飲劇心眼空

扣寂發高談宣籟愜隱衷肝膽炯相照焉測論所終

筆將五嶽撼弓引三石雄

時侍御自稱善射

恢張文武術放

浪巖壑中酒餘興不歇醉眼臨朦朧晚峯亂雲石野  
火明霜楓樂極理應旋高揖謝志公眷茲幽人懷千  
載亮一逢

秋日小病偶得若昧師貽野外罕人事詩依韻

有作

空虛無織塵攬之遂盈把跡絕類孤猿情紛逐奔馬  
不觀天鏡清焉得人事寡作主始引竇因病乃得暇

偶坐禪林幽在市同于野風來聞妙香馥馥長松下  
萬物詎可外孰是超然者取適地無選此意未可寫

登攝山

委曲歷巖岫振衣攝山頂心目頓以豁廓然開一境  
達觀無近懷高步寄遐引林壑漲松濤虛空墮雲影  
遠霧羃大江荒煙迷萬井東南折吳楚攬之若浮梗  
吾生嗟有涯氣意詎能騁聞茲有靈藥可使頽齡永  
願與山僧期依緣同結靜

同心持再過天開巖諸勝

晝行不厭山一日幾回互層層若出新亭亭遂如故  
巖下雲鳥翻林間松風度幻跡非有轍素心庶無誤  
訪蘊暉師偶錯徑路首句及之

古樹散荒徑誤至亦清嘉爲問菴中僧坐對紅梅花  
新年不作詩竟日誦法華誦罷復何爲登高摘雲霞  
羨之不能從浴洞令人嗟

初夏國華宗侯招同趙當世集竿堂限韻

多病閭戶庭所嘆嘯侶寡碧篠散清樾同人曠于野  
軒車馳如雲何似遊娛者況復比隣居不減雞豚社

小飲醉玉茗塵容一以灑

此夕

此夕寡酬對涼颺集前盪沐浴得小暇枕簟遂加清  
疎疎揚短髮飄飄落長纓何事林樾蔭悠然滄浪情  
俄頃用已克況乃永無營

暑宴客散畱范東生茅公選劇飲有作

發發涼風吹油油暮雲垂黓黓燭華落明明月光披  
澹如秋氣集曠然清堦堦墀衆客有時散興來君莫辭  
展巧翻妙曲競醉傳瓊卮跌蕩京洛塵飛揚少年姿



谿水無停流，樵歌聲未稀。  
憂來信無方，酒至令人怡。  
華髮亦零落，攬鏡添酸悲。

重遊牛首

出門快山遊，身輕脫微纒。  
驅策鳳臺街，馳神牛首麓。  
蟬響答清吹，林陰交翠幄。  
小雨潤輕綃，淺草綴深谷。  
寺前聊停驂，霞外已凝矚。  
翠微發新悅，佛窟追舊躅。

輓萬心源憲副

昔予遠遊宦，鳴琴坐壇石。  
側聞外臺使，委身棲藪澤。  
天祿會然藜，柱史會檢籍。  
擁解惟觸邪，批鱗寧避逆。

尋清暑路霜再剪荆臺棘蔚羅虛張機鳴鴻已振翮  
歸來松林中夷猶任所適賭墅遊東山看花步南陌  
恩施少伯金義置希文澤神馳箕尾征勲畱鼎鐘勤  
高山夙所仰緬往今始覲設榻非無心披雲竟空憶  
聊爲瀼露吟爲君宣竹帛

白門九咏

有序

夫孺子滄浪物有自貴而遊魚忘水人苦不知予  
以疎徑之習偶寄白門之官歲月川流似馮唐之  
易老煙霞疾痼非叔夜之不堪欣斯入地之宜無

卷之三  
慚吏隱之目比於八咏絕少四愁詎曰私懷聊示  
同好云爾

憶昔燕臺遊馬塵高十丈一官寄白門地清視俱曠  
疎林映行車青山披絳帳古人吏隱稱于中見微尚

其二

高皇蕩荒穢四海廓以清蟠踞王者宅巍巍莫神京  
美哉江山勝萬古遊昇平小臣忘帝力歌頌宣休  
聲

其三

混沌既云剖高風揖皇唐紛紛末世流于野戰玄黃  
幸茲人境清悄悄詎足傷桃李自成蹊涇渭亦分漳

其四

六代互廢興繁華非一朝風流王謝擅名理支許超  
江山歷幽討丹巖遞相招高步縱屐齒御風吟逍遙

其五

古道衰漢代綿蕞雜秦儀盛世經中和垂裳坐無爲  
夙夜何所事清風揚夔夷登堂三揖外退食良委蛇

其六

無事效官下有朋自遠來慙非大匠門所過皆妙才  
微言證玄賞高論出清裁彈琴詠先王茲樂詢無涯

其七

杖策出城南偏多物外情雲徑互往復林香相滅生  
分靈現諸佛淨妙非一名何必逢箕穎而迺輕冠纓

其八

禮非我輩設況乃寄閒曹五日一視事事稀人寂寥  
慷慨聊顧曲音響一何超泠泠激綠水渺渺干青霄

其九

生平抱肝膽所向天下人俗流苦不同辟彼越與秦  
斯焉可取斯四海若比鄰高山鬱相望芳蘭氣彌親  
常恐離別至銜杯爲酸辛

贈別焦弱侯先生

古人不復今西風盪秋草先生松柏姿三代見直道  
大義衷羣言皎然日星曉衣冠亦許由述作比彭老  
狂人歌鳳衰何足掛懷抱

其二

不見鄙吝生謬稱黃叔度於公予亦然孰能知其故

不能三日別況乃隔殊路願保金石軀何必相朝暮  
明月照江山可以託衷素

贈王太古山人

秣陵山水佳交臂半詞人筆舌爭雄長氣詎或不倫  
王君居闕闕自稱太古民望之似鄙朴挹之多清真  
慧理抽新詩衡門絕緇塵吾亦將避世托子牆東隣

贈別國蕃年兄

登高垂絕壁涉險臨重淵出門多交遊寧知路回遘  
少年託蘭籍相顧忽華顛攘攘市道趨獨子金石堅

愛名復愛身良規切韋絃日月不能駐修塗話離筵  
我將歸西澗子尚留金川禪越形莫俱惡能不黯然  
寸心貴不渝相照古人顏

爲修吾宗侯題四詠

好修堂

非澤不紉佩非芳不製衣修潔性所好敢傷知者希  
看花啓繡戶避世掩塵扉惟貪枚鄒輩載筆無相違

燕坐齋

燕坐何所思空齋日寥寂岩廊正垂衣林園足枕石



中壘傳五行河間擁羣籍何如澹恬愉無功乃勲績

最樂處

名山滌大江龍盤亦虎踞美哉佳麗區東平得所遇  
曠然千秋情詎作五色蠹爲善附古人是稱最樂處

羣鷗隔

小閣臨清淮古木蔭修渚空翠落几席瀟然自成雨  
孤坐時檢書客來或傾醕翩翩無心鷗來往相賓主

余往令鍾陵去此廿年丁巳以督學一再歷情

景依然偶得五言古五首

憶余盛年時綰綬鍾陵道吏事非所云志意殊廣浩  
星霜十餘易一官尚小草枯管何不靈還復弄浮藻  
停驂覽風物按籍尋舊好吏人跪致辭夙昔供灑掃  
少者髯如戟壯者髮如稿余非金石姿焉得不速老

其二

故人多濶絕停車叅玉版古樹尚鬱然清容相覘眈  
日落影翠微風來締帶縮坐此不能去盼盼見青眼  
豈乏園林佳幽意良有限悵悵忽分攜何時對杯醖

其三

舊唐書卷之三十一  
昔時論文友英森不勝紀  
及注苦沉淪  
我我凌雲起  
貧者或在巷  
貴者多連軌  
銜杯偶星聚  
往事展相理  
敢云尼山杏  
不讓狄門李  
得失總一時  
吾道固可喜  
願言懋大業  
詎爲名利餌

其四

人踪等水萍  
世路逐林鹿  
獨此嶺上松  
而共嶺前竹  
亭亭三五竿  
孤清漱寒玉  
車馬日經過  
塵容浣以濯  
懋汝非自今  
見汝宛如夙  
對之澄心顏  
此君真不俗

其五

古人稱絃歌流響千載後予昔試一割去茲亦未久  
雖無河陽花猶見羅溪柳青青映長流蕤蕤覆連岷  
行人憇餘陰涼風掃襟肘所欣嗣者賢灌培日以厚  
容爲詠棠芟惶恐謝否否

述懷二首以著作被焚也

離合豐城劍得失荆人弓天地亦大矣變化焉可窮  
魯壁嗟未喪秦灰杳無踪日星燦河嶽精英昭鴻蒙

其二

身外皆長物詎足櫻吾胷是物關神明憂心忽忡忡

曠覽大道因追思愆尤叢業應綺語報觀等浮華空  
古來多文人存者誰爲工譬猶涕唾落心想不復庸  
沈叔敷同年招飲一杯亭和韻亭爲昔賢趙汝

愚所創隣謝壘山書院

孤坐身似棘數日雨作惡忽爾霽四山灑然出南郭  
吾友攜一杯相與叙寥落晴峯鬱青青晚雲澹漠漠  
沿谿羣流奔觸石怒濤作浩歌侑清歡斗酒洵不薄  
山靜足深語微醉且淺酌觀物世可遺達生意彌廓  
趙謝千載人對之或無作

東林寺走筆題三昧上人冊

偶過三笑堂政值三更午試問三昧師汝律成何矩  
淤泥生蓮花香檀非淨土送我且過谿山靜不驚虎

康侯王孫投郊居詩答贈

朱邸豈不華于郊曠人境作詩擬陳思雅詞謝汝覲  
吳門一交臂萍踪各以迸嗟此官下身繼我麋鹿性  
忽然投瓊瑤燦爾朝日映慙無明月珠聊以托微詠  
蔣徑許相過嵇駕儻可命

寄懷鄒爾瞻先生

海內多英賢人思托龍門涉海斯測廣登山乃見尊  
嗟予廿載餘氣意遙相存違茲三生緣膝席獲討論  
高會盟白鷺名山締青原俗吏苦行役臨岐幾銷魂  
西風迴江流寄言申所敦

濠梁驛作

蒙莊妙齊物高寄在濠梁川流自古今魚水澹相忘  
那知千載後踐爲車馬場乃悟淨奧闢造境固無常  
但存濠上想何地不尚羊

贈別周平卿觀察山東

有序

平卿周公經綸時傑肝膽古人無物不懷於予獨  
契憶自領蓋長安歷今十有三載輜軒所臨半屬  
吾土于焉徘徊三洞周旋兩峯行杯爲歡授箸彌  
泱無殊牙期山水之好不減管鮑貧時之交間有  
各天恍同接席頃予以北征之役偶憇家園與公  
爲南山之遊僅踰晨夕忽而以觀察山東行矣浙  
民有懷攀依棠樹余心若失黯結河梁病不能思  
率爾裁句庶幾展卷有如握手云爾

少年矜意氣然諾許一時雲雨遞翻覆中道忽以移



與子稱素交白頭亮不疑傾蓋燕市中于秋結心期  
所嘆吳楚隔晤言常苦稀余歸自江干習懷方云披  
詎意簡命新分攜在須臾余偶滯愁病子乃揚幃帷  
執手不能別臨岐問所之所之云何方節旄臨齊魯  
殷憂切安危爲憲藉文武自昔稱才雄姬公嗣仲父  
匡定恢王風鴻烈邁千古吾子抱智畧豈彼榮圭組  
況茲值凶荒亦復苦夷虜何以妙經綸疆圉獲安堵  
懋哉廟廊勳豈惟莫東土

寓林詠懷四首

處世嘆不偶入林仁天放青山日在眼怪石非一狀  
莽莽墮雲片層層湧海浪蜿蜒伏蛟龍偃仰臥獅象  
文鳥從空翔古木緣崖上靜對殊闐寂周還亦跌宕  
何必三神山此中足微尚

其二

人言蓬萊山乃在南山居浩然賦歸來高步縱所如  
豈無當世懷躡躅柅軒車直道旣訕桺卷懷竊同遠  
少壯具傲骨老矣焉能除仰天看飛鴻臨淵樂遊魚  
萬物各有適吾亦遂吾初

其三

日月行無窮人生不滿百擾擾世上人富貴苦煎迫  
高談匡世畧俯籌資身策嗟余兩無成抱茲一丘瘳  
寂寂坐長林磊磊對奇石石林石靜無言何懷若有適  
無求國士知寧問室人謫

其四

無事踞幽石憂來忽填心壯年挾扶光老病俄見侵  
夏木殷以繁臨秋葉辭林手揮魯陽戈旭日竟西沈  
慷慨中原楫嗚咽梁甫吟聊復紆此懷時去力不任

達人貴遐覽避影以息陰

郭凝之三十初度自題秋水圖漫述斯意爲壽  
大地殺萬形紛紛太清滓瑩然無一塵我見惟秋水  
白月相與澄晴雲自來止有情誰與倫郭生無乃是  
靜容物與偕沈姿意不起澹遠披穆風陶汰味禪理  
時過南山幽每臨西湖淚所航在玄素攸好匪青紫  
淨因自性生刻畫詎足擬余媿千頃陂輕清畧相似  
問字喜侯芭篤學方顏子冉冉十年餘倏忽歷三紀  
年往神不渝莫逆笑相視何人畫斯圖丰容豈其比

噫余生平契庶爲模所以亭亭雲霄上飄飄巖壑裏  
行藏不可知知者我與爾展圖窺意表千秋亮同美

邀李宗文飲齋頭兼酬贈言

宗文是本  
寧先生姪

空堂澹雲氣新夏澄秋陰爽爽人中雋穆風翩其臨  
清言理玄緒小飲披冲襟雖無絲竹奏而諧山水音  
詎云和郢曲聊以託阮林

謝巖詩

有序

謝巖者南宋謝希逸莊鎮襄陽時所嘗遊詠其間  
遂以名巖者也今去千載而遙苔蕪林莽幾就堙

五何必減驃騎已將世事等批糠況有神仙說靈秘  
崆峒之拜我未下會聞七聖迷中野悔從博客趨  
羊懶向牧兒問害馬此意茫茫未可求羨君先上蓬  
萊洲九江之水一衣帶何時共結名山遊

柱杖行陶大冶山人見贈竹杖率爾答謝

胡爲乎大塊勞生日踰躡扶光東躍沈西陸羊腸鳥  
道不可言牛走馬走何僕僕已聞健兒困犬戎復道  
波臣橫鴨綠杞人無事憂天傾彼其之子飽食肉膏  
生讀書何所爲俯仰天壤聊躑躅逢人且作名山遊

桂杖況有名山竹光茫百道色飛金精瑩一片神如玉扶鳩跨鶴下千峯白石丹丘起雙足朝看紅雲出溟海暮看青霞藹林麓與君徙倚同遊觀矯首飛來古天竺

遊戲平林圖語溪令周茂實爲秀州徐司理索題

北峯峯高高日午科頭箕踞長松塢自矜無事卽神仙頗覺山靜似太古穆然戶外清風披忽報書來自語溪開函綠字飛玄圃拂卷青林下墨池此卷傳自

何人手秀州司理徐君有千重巖壑起縹緲一片雲  
烟落林藪文鱗繡羽不盡妍雕房畫閣姝嫣然季倫  
未許驕金谷摩詰何須繪韜川此中臥遊真可老恍  
惚上下山陰道看君懷袖有名山知君出處非小草  
西方太白氣未銷東海長鯨怒欲號撫琴縱可落山  
響還向牀頭拭寶刀

白日嘆爲故同年沈孝廉啓縉作沈以母歿

白日皓皓雲茫茫秋山淒斷不成行鳥飛從橫薄霄  
漢獨有啼鳥堪斷腸人言烏慈能哺兒一朝血冷化



爲鴟人言虎毒不食子穴中毛骨何齒齒青青陌上  
桑何以泛柏舟周粟亦可肥胡爲餓荒丘共姜抱節  
祇自苦申生捐軀徒爾仇魯連射書太冬事仲尼沐  
浴何深求吁嗟乎天分寒暑地分東南獸有羽毛人  
有衣冠秦強無力能存楚申胥血淚傷空彈

讀董伯念傳慨然有作併序

伯念董祠部弱齡奮跡三十登壇華胄高門秬雄  
詞長而且約身敦素士之風抗疏標直臣之節一  
劔足酬萬金立散可謂清朝之仗馬濁世之棲鳳

而生不逢辰才不展志摧殘市虎偃蹇人龍向平  
之懷未紓長歸之病竟廢海內之士莫不憐其苦  
潔悲其所遭而吾友薦卿其舅氏也既抱才士之  
痛復深渭陽之情哀集遺文更立小傳情詞俯仰  
凜有生氣余于伯念氣疎跡親九原不作手讀一  
過風雨淒集不勝河山之感聊代長歌之泣云爾  
嗟吁伯念宗伯之孫給諫兒魁壘落拓開當時一棺  
戢身都已矣千秋令譽良在茲痛君有臂不可把讀  
君遺事淚俱下世人富貴何所爲詎如抱甕負薪者

生前踔厲凌高雲，歿後彫殘瘞原野。古來共盡何足  
論，但令骨朽名猶存。向平損益見何遠，虞卿窮愁遭  
其屯。千言悟主主不悟，萬金散人人無恩。脫屣長安  
去，歿路掛冠嘗下辭。生門生門歿路空，中花文彩風  
流落。齒牙曠士爭誇，祠部節俗人羞問。尚書家憶昔  
臥牀對君面，雙眸炯炯如掣電。一夜西風白晝陰，可  
憐相思不相見。那家殄瘁人云亾，東菑掛劍徒爾傷。  
有舅文章甥不歿，始信情深是渭陽。

濟水行公車阻東征兵作

北風秋晚黃塵起片帆日暮臨濟水舟子躊躇未敢  
前爲報軍容盛千里千里軍容奈若何東方殺氣翻  
鯨波閑山百萬橫絕海越嶠六千飛渡河渡河絕海  
不羨生白羽赤羽驕從橫將軍敢決中原戰司馬羞  
言城下盟戰色陣雲紛絡繹怒濤奔瀑驚辟易但聞  
大將近登壇不數書生遠前席嗟乎天下紛紛自此  
始徵兵轉餉何時止長楊宮裏樂未央細柳營前慘  
欲歎我生逢此何足言烽烟極目迷平原高譚且置  
封侯事誼傳天子將臨軒

觀海歌

山海關作

長日獨坐秋寂寥驅車海上觀秋濤秋濤莽泱橫無  
際北抵燕支東度遼北伐東征空咄嗟且躡雲嶠曳  
雙屐平沙渺渺蕩空明山峯能青岸能白岸白峯青  
天際來虹光蜃氣高樓臺搖落千層花噴雪怒號萬  
里勢奔雷噴雪奔雷氣未平急呼濁酒杯中傾當杯  
入手不惜醉眼花泊水紛從橫醉眼從橫何所見遙  
指秦皇石一片十洲三島徒爾爲荒城白浪空如霰  
東望壘壘烟霧間相傳道是姜娥山望夫化石石不

化愁絕長征人不還人住有情不可已海水東流亦  
如此無情獨羨海邊鷗閑薄雲飛逐雲止

從天目登徑山次蘇長公韻

擾擾不耐塵爲客夙昔愛看名山色朝登東日夕西  
目處處秋林見山骨徑山石上層雲蒸凌霄撒日如  
秋鷹風吹萬竹聲泠泠欽師慧老嗣明燈徑山和尚  
知我至迎問東西目何似我言千丈巖斷獅子吼秋  
色長空絕文字

爲楊使君題屏中芙蓉石圖

南宮號石僻靈壁與研山千載有子雲摹置几案間  
周生妙墨筆能吐芙蓉一片萃而古疑就米手攬得  
之我欲從之同拜舞

五月從李伯東先生招飲得沈石田雪圖詩披  
之依韻命作以志別思

日下岑岑襍襪子忽地清廳生戶裏石田寫作雪山  
寒五月披裘無乃是何必姑射求神仙入火不熱賴  
有爾縱然斗酒醉李白猶自翫銷苦風雨

題李翁九龍杖歌

有小序

八十一李翁我叅知公伯東先生尊人也先生臨  
玉版居出翁手書詩卷字字欲飛而九龍杖歌尤  
詣神妙屬漫題塵案中亦復走筆歌之龍吟之餘  
聒以缶響有同續貂直供一捧腹耳

玉版長林坐聞寂青天風雨四面集醉眼高歌神欲  
飛何物精英李翁筆李翁瞿鑠如少年矯矯澗步人  
中仙掉頭直視閩海日聳身可躡扶桑巔排空凌雲  
氣豪上神來睥睨九龍杖千枝萬枝森琅玕長臥長  
吟屹相向崢嶸歷落出山阿得意逍遙一嘯歌騎鯨



卷之二  
三十一  
跨鶴不足訝，葛洪千載還來過。此物得心妙，應手潑  
墨揮毫縱。玄圃須臾紙上鱗，甲飛咫尺眼底雲烟走。  
倚翁柱杖披翁書，山陰涓畝移前除。墨瓊白玉爭輝  
映，鳳尾龍孫誰得如。

樓賢歌

山在潤陂唐戴叔倫隱處戴潤州人

我聞樓賢山右踞，潤陂側折腰苦。逢迎覲面未相識，  
去年蒼崖蔓秋草。凌巖直上風蘿道，半而荒餘一畝  
宮。四周青作千山抱，世人不解稱仙翁。千載於今識  
戴公，分將北固山前潤。沁作西江陂上功，銀章金綬

百城長枕石漱流臥其上溪溪垂釣落珊瑚樹樹披  
襟坐莽泱足不離山三十年樵歌漁唱相周旋袖中  
挾有丹山訣筆下時霏白雪篇阮家仙源未爲誤武  
陵移入鍾陵路棠陰松影兩不磨人世浮雲何足駐  
吁嗟戴公安在哉風流千古小天台虛名盡慕南州  
榻勝事爭傳帝子臺嗚嗚父老無美惡于中欲起寓  
庸閣但信江山今古同那知戴翁不可作嗚呼桐鄉  
祠峴山淚昔人不畱今不去曾史堯桀無定據我與  
戴公等一寓願語後來人爲護清溪碧山無恙長此

住

春江花月夜

渡楊子作

暮春春江春可憐春花春月夜娟娟花容映月嬌無  
比月色臨花態倍妍江頭月色年年在惆悵花容不  
相待洛陽城東風欲摧天津橋下波無賴流水飄風  
無定朝可憐花月影寥寥愁翻楊柳千條綠恨逐廣  
陵百尺濤萬恨千愁不可支無情江水逝如斯花前  
自緩芙蓉帶月下羞攀桂子枝桂子芙蓉何足道春  
去春來怨芳草惟有春江片月明花時尚把離心照

除夕送門人盧玄則南歸應有司試

放衙散吏簾幕虛爆竹一聲報歲除次第閒看案上  
牘倥偬忽報家中書書裏緘情幾萬斛含愁含怨不  
可讀盡道官貧不濟人膏竭腸枯骨無肉盧生向余  
拍手笑區區俗情何足道曾知盧生書亦愁開緘不  
語但長嘯白頭縣望青衿兒州郡方傳茂材詔須臾  
六翮欲摩天隻身尚滯鍾陵川總然挾有追風足恨  
不先飛士雅鞭黃生爲言盧生且莫癡丈夫會合應  
有時但知顏淵與子奇試問八十蟠溪七十五羊皮

看生骨法非凡種友莊師老呼周孔兵車宗廟烏足  
云風乎舞雩歸而詠莫問河陽一縣花春風曳裾煙  
水槎六橋無恙三生夢還昇藍輿處士家

高保山房歌

有序

高保山房者余同年黃子九石之先公肖泉先生  
讀書處也先生素業傳經高風秀世深孺子慕選  
瞻白雲抱處士標幽棲玄草味泉習靜清孤水石  
之居仰止景行宏遠箕裘之緒先生逝矣勝境依  
然九石有懷考心聿繼祖武校書天祿香名已嗣

無雙雅意人倫先志還圖不朽乃屬年家子黃生  
追往述來裁之歌詠詎曰闡揚龍德庶幾彪炳風

毛云爾

海山蒼翠海雲紫高保亭亭屹孤峙上有長松拂澗  
花下有寒泉漱石齒何人曳杖一登臨黃公舊日讀  
書林巖棲川觀高人宅雲臥霞餐處士心更有深懷  
世莫識悠悠不是煙霞疾玄亭俯檻挹清泠高山仰  
止瞻翠嶽軒中習靜真可老束皙之詩子雲草周旋  
疑共竹林人應接何必山陰道嗚呼南山北山多奇

踪無雙江夏獨黃公撫枕低吟孺子慕彈琴高詠先  
王風高風九原不可再高保之山儼然在庭前玉樹  
森成行林下槐陰拂如蓋副墨之子洛誦孫黃河之  
水來崑崙可知代有麒麟種已見名高金馬門

苦水行

白日紛紛黃雲起大風咆哮獵苦水馬蹄躑躅人面  
沉須臾胡沙蔽千里胡沙汗漫不可揮彌天漫地無  
容輝一自真人麾白羽廓落千秋靜不飛千秋廓落  
淨若掃忽爾蒙茸幽州道大者如山細如霧平地沉

車蹂春草吁嗟乎長安市上統誇兒雕楹瀟閣倚鸞  
帷吹笙雜坐飲美酒安知道路多送離君不開苦水  
行

中秋兩宿玉山客館偶尹明府見餉尊榼次壁  
間韻率爾書謝

秋山黯澹宵無光秋雨蕭瑟鳴空牀橫雲塞霧連混  
茫安得明月皎於霜美人千里遙相望慷慨起舞淚  
數行誰能爲我飛杯觴玉山忽爾來瓊漿須臾山色  
淨如洗微風白月濤聲起當窻急呼琥珀杯飲酒不



辭如飲水良宵三五良未已主人情濃世無比我亦  
因之消魂磊

老將行

爲婦翁張總帥作

學書不成翻學劍投筆橫腰插羽箭少年意氣噴虹  
蜺不似書生驕白面仰視青天迅日輪出身便欲圖  
麒麟若箇終童堪繫越何物鄧禹能笑人蠻夷跳梁  
虜未滅鯨魚跋浪馬蹠踐自照鬚眉亦丈夫擗取頭  
顛灑熱血附鳳攀龍此一時全身負膽當驅馳飛鞚  
軸蘊八千里坐擁貔貅百萬師一生志畧有如此自

許封侯立可俟不數班生戴虎頭輕薄伏波長馬齒  
天道茫茫不可量數奇自古同悲傷幾見虛名依日  
月空餘傲骨銷風霜風霜銷鑠何足道憔悴春華作  
秋草後生得意相揶揄

陛下愛少臣已老嗟乎人生富貴無百年浪說鷹揚  
獵渭川但使天涯兵氣淨東陵之瓜南山田

爲大納言沈公賦玉陽圖

少年風深茗雪想甘載西吳數來往布帆時掛魚鳥  
問容身每臥煙雲上碧浪從橫蕩心目中有一山浮

片玉秀拔羣峯七十二清映洞庭三萬六何人不愛  
此徜徉玉陽先生家其傍孤高四座落山色遠碧疎  
簾泊水光先生吞吐在宇宙一丘一壑何足囿暫將  
巢許着雲冠偏許夔龍領霞岫一官自昔瘦休文大  
隱清朝孰似君朝川圖畫東山展鶴立鷹揚總不羣  
送李玄白下第東歸

霜風浙浙破四壁鴈叫長天馬嘶樞搖落黃花當柳  
枝把酒送君君奚適古來坎壈難具陳吾生遇合自  
有神燕人寶石如寶玉葉公好龍不好真只今圖畫

滄環堵誰使青天作風雨當時一世人中龍長臥陸  
中詠梁甫白璧自來天下奇卞和未剖秦庭疑天生  
我才必有用世路悠悠那得知

讀樂天不能忘情吟亦戲吟嘲之

香山自號樂天老萬事如君應盡掃三杯美酒爲消  
憂一卷法華可除惱世間何物足關情胡爲長吁短  
詠不能忘情吟駱馬駿聲嘶岐路楊枝妙曲愴悲林  
躊躇婉轉腸欲碎駱駝勒回素反映一杯一淚從此  
辭慙默然不能對眷茲三千六百歡嗒成二百五

十言青驪紅袖白公調千酸萬苦同一門樂天樂天  
天安往一片情來空執掌平生嘲笑垓下歌卽今竝  
悴烏江上情兮情兮可奈何余亦情人閱逝波廣陵  
八月濤聲落尚唱春江花月歌

生人行贈曹生

有序

曹生字子墊楚雲杜人眉目森秀大負儒者之器  
以十年沈病遂精星家言偶與李本石入京師聽  
其言俱微眇長安公卿趨問如市生又急別去余  
愛其人走筆書生人行贈之時丁未閏月三日也

大地生人紛碌碌須彌投芥海投粟誰爲司命誰別  
生君乎牧乎判石玉曹生自言得悟奇手搏造化弄  
小兒二六時中叅刻漏十年運底定于支有氣有形  
卽有情自貴自貧自歿生落筆操符悖神鬼肩摩轂  
擊駟公卿區區崛強不信命忽聞高譚亦起敬靈心  
如鏡寧受塵殺氣干霄貪說印今來古往官如林百  
年九列總浮雲貂冠橫道虎成市鴻棲豹隱幽山岑  
有命無命未可曉仲尼不貧顏不夭與君痛飲讀離  
騷椎破星盤問閻老

爲李邦秀孝廉題佩石贈言冊

我聞米顛拜石丈舉律玲瓏兀相向又聞王烈百歲  
餘入山吸髓披素書神仙不作顛徒爾李生何爲乃  
佩此人言聲價高連城自許風標清礪齒此石匪靈  
亦匪頑含貞韞璞有無間欲拔羣峯開五嶽好將片  
意付它山

送米友石遷令六合君舊爲銅梁長

米君弄石如弄丸十年改邑不改官爲經鳥道三巴  
險去聽秋濤六合寒六合三巴何足道到處江山在

懷抱墨汁淋漓潑畫船霞光錯落霏丹竈殷勤把酒  
送君行論交慎莫傾平生才子偏能侵造物時人誰  
不妬高名高名見妬古來有自今妙出經綸手君才  
何所不千秋宴坐鳴琴亦不朽

衆壑雲橫圖是董玄宰筆爲蕭九生給諫題

余昔置身丘壑裏高臥雲深看雲起從橫幻出衆山  
秀虛無不作人間綺自入長安潤客塵山色雲容失  
其似誰圖此卷妙入神今之作者董太史澹烟疎雨  
霏晴空碧岫青林映川洙墨氣淋漓五尺絹眼看真



山只如此少文攜之臥可遊汝南展來病亦已蕭公  
此與頗不淺巢許衣冠無乃是

題范長公七十松萱圖爲范宣卿少叅兄

君家少伯本神仙君懷瀟灑亦復然少年讀書破萬  
卷才高落筆凌風烟中歲自稱鏡湖逸千頃宿雲五  
畝疏柴桑且喜子孫俊向平況復婚嫁畢仲君歸壽  
腰橫金東海爲卮共酌斟松花護草齊眉案八百三  
千邈自今

長歌別鄧玄度司諫之金陵

西風獵獵掠秋草黃塵汗漫燕山道一手誰能排霧  
雲仰觀青天日皓皓卽今狐兔從橫馳走狗飢鷹勢  
若掃何人不放賈生哭若箇能舒杞人抱君懷磊磊  
膽全赤頭髮上指裂肝腦呼朋飲酒且勿言白簡含  
霜囊括皂登車不問燕山塵但說秣陵秋色好熱心  
一片冷如鐵靜閱狂瀾流盡倒天子何能無爭臣忍  
使英雄氣枯槁清流濁流定片言須令丹衷對蒼昊  
嗟予有心鬱未紓嗟予抽身苦不早蛾眉見妬古來  
多做骨一具吾自保安危大計君等在西湖南山亦

堪老

引勝歌爲張衆之賦

仰天白眼看萬古古來賢豪不勝數得意失意總一時  
時忘世忘天誰解取淋漓我愛伯倫頌以酒爲生白  
日送清真又愛陶潛詩詩中篇篇皆酒卮始信濁醪  
有妙理步兵少府真吾師卽今酒徒滿天下孰是超  
然稱達者烏烏悲咽南山歌憤憤恣睢灌犬罵吾聞  
醉翁不在酒此意酒人不能有獨有山陰張衆之日  
日掀髯開笑口金谷蘭亭是勝場松濤竹籟呼好友

酒人遇之皆狂走

煉丹臺看雲

黃山

黃山峯頭紫日宿烟霧如帷障茅屋跼足閉眼胡爲  
乎辜負蓮峯三十六忽然諸子躡芒屨仰天踞峯發  
狂叫何物丹青點太空倏忽雲君現衆妙張生手指  
西垂雲流金耀赤揚紫芬攜將碧落千重翠散作青  
天五色文郭生笑指君不見百丈從橫如匹練晴煙  
寒雪起紛紛春水秋波生片片吳生稱奇舌不下爛  
漫筆端難盡寫紺殿移來錦繡屏天闊曳出驛驅馬

潘生掀髯道未奇博空執象徒爾爲藥成丹鼎人仙  
去雲憑霞情無定姿茆庵和尚無如何望空合掌稱  
彌陀道臺不作空花相綿手擎來優鉢羅黃生聞之  
倍讚嘆恍惚插身入霄漢諸君繪天天無工神理從  
來呈變幻幻盡雲空照不窮古月孤峯君試看

釣臺

富春山頭白日高  
清颺琅琅披林皋  
軒冕虛傳漢帝  
座釣竿長拂嚴陵濤  
雲臺功臣已千載  
傑閣清江星  
渚在至今不墜  
先生風當時畱得狂奴態  
吁嗟乎人

生富貴如埃塵彈冠未遂卽垂綸及時不作滄洲臥  
徒令鄧禹來笑人

從焦弱侯先生訪陳季立翁於僧舍有贈

陳翁

故爲戶侯

草庵蕭蕭傍玄閣疎樹斜陽透籬落中有高人踞榻  
眠握手掀髯視寥廓自言病足足甚奇纔到登山勝  
健兒東遊海岱西太華插身霄漢臨峨嶂韓彭勲業  
等塵土冥坐蒲團證千古微妙直扶羲皇前毛公由  
公何足數塵談所至暢玄風令人重見希夷翁生來

仙骨非侯骨高顙隆準雙方瞳問翁行藏何所止是  
處石山容屐齒縱心獨往無窮門不論此身歿不歿  
翁今杖策過西湖梅花孤嶼尋林逋三月采蓴六橋  
下我亦歸來作酒徒

石馬行

望望樓霞十餘里蔓草荒榛村落裏田間一道古殘  
碑蒼茫剝啄無文字土人誤指梁武陵不然諸王貴  
公子纍纍石馬埋其傍牛羊蹴踏不復起當日豪華  
意氣多驕驕手控追風過道路行人皆辟易慎莫近

前遭怒訶卽今丘隴夷樵牧眼見荆棘生銅駝石馬  
夜嘶悲奈何四座莫喧聽我歌六代衣冠一剎那千  
古山河相盪磨何如策杖捫煙蘿牀頭手提酒一壺  
仰天劇飲朱顏酡

中峯

繖山南下中峯側歷落巉巖岬復仄短筇斜倚立若  
眠長鬚遙曳行如揖紛紛綜錯龍點鱗稜稜削就馬  
銜勒我昔經過大叫奇山僧搖手推不識婆婆娑何必  
愛平夷妙在嶽崎人不知奇語煙霞後來客好將傲



骨磨嶮巖

祖堂觀百祖像歌

祖堂之幽寺林僻山光涵白樹涵碧午鐘飯罷驅車  
回忽報其中有奇跡索取古跡云何奇西來東渡人  
天師名手畫成百祖像三百年來共寶之焚香盥手  
啓篋看一師一代人殊觀秀眉慧眼映月滿長耳大  
鼻臨雲端有如灰灰枯木冽冰雪有如巉巖怪石高  
峯巒慈緣救世曇花現怒或降魔鈴杵寒龍文虎變  
妙神理狂走蛇神怖牛鬼血肉凡夫那得知九尺四

寸粟而已吁嗟乎我聞中峯和尚會傳神幻人無相  
相非真虛空不動日月出千山萬山光輝新應知山  
月無畱影莫於鏡面添埃塵

可賦亭歌爲唐仲言山人漫成仲言雲間人五  
歲喪明而能古文能詩偶移家白門之珍珠橋  
友人許比部爲構茅亭一椽余題之曰可賦取  
杜甫已公茆屋下可以賦新詩之句

人生落落乾坤裏千家萬家同托處豪門大宅不可  
量長干甲第連雲起先生五峯三泖人忽然移家來

住此胷中豁達藏羣書兩眼混茫無隻字抱膝兀坐  
何所求茆亭一間而已矣斜溪疎柳插板橋入窻臨  
山戶臨水車馬粼粼溢街巷問奇載酒無虛晷醉後  
時吟十二家醒中暗模廿一史問君此亭何以名草  
玄野綠不足比巴公之屋杜陵詩知君可賦當如是  
我亦拂衣澹蕩人與君相見卽歡喜君但能來我亦  
往把臂高歌水之涘掃門請謝繁華子

徐孺人六十華誕爲孝廉李匡明之母歸而上

壽詩以貽之

漢庭昔下孝廉詔  
移孝作忠古之道  
方今明經兼茂材  
天下英雄展懷抱  
李生有才不見收  
十年彫敝洛陽衰  
欲歸愁歸母也壽  
怡逢六十高春秋  
我言生歸莫潦倒  
高堂政足舒言笑  
春風緩放上林花  
秋霜不折忘憂草  
君不見今年射策人  
誼傳姓名第一猶虛  
縣飛觴且作老萊舞  
振衣還上孝廉船

楊師母陳老夫人八十高壽詩以奉祝

奚斯頌魯稱壽母  
燕喜肯屬尋常人  
吾師博雅子雲匹  
復有德耀超常倫  
內言靜聞闔不出  
八十年來如

一日翩翩令子真鳳雛少與同依伯仲呼君今符采  
承溫色余尚含香滯舊都瑤池桃熟入勝會舉觴遂  
阻升堂拜舍傍泉湧供魚鮮雲外詩成題鶴背氣暖  
萱堦晚更芳賓朋歲歲傾玄霜它時江海拂衣去載  
酒君家樂未央

題張衆之畫扇

三百歲期僅五十無量三萬六千日紫芝白苓供服  
食長髯飄飄松下出綠繞十尋上千尺招搖赤松與  
黃石黃石者誰貞父筆

春雨夜集陳白室陳寄南惠石泉莫秀甫諸丈

偶得覃字

春寒日晦風雨覃閉門孤坐心如煖攜將斗酒集五  
老燭下快飲樂且湛良時恰逢二月二紀年合之三  
百三吳門高客號白室北郭野老稱寄南惠翁行年  
已七十清泉白石遺冠簪坐上莫生生獨後髮疎齒  
落願空含拂衣歸來予亦倦諸君歲月中相參人生  
百歲能幾何牛走馬走不可堪況今兵戈紛轉輸東  
征西討愁丁男東南半壁若騷動安得舉盞從沈酣

明年花朝知誰健桑榆未必同蔗甘但使時平俱矍鑠依然詩酒霏高談

沈五陵八十翁生辰卽次七十壽詩原韻奉祝  
四海之內皆吾友人生老友良非偶慷慨白日可旌  
心倏忽翻雲但有口春風夏雨歷歲寒如君襟期世  
希有快從湖海嘯且歌恥與妻兒兀相守平原客舍  
常作客高陽酒徒亦飲酒博古無煩按圖索登高不  
須扶杖走衣冠堪比采芝翁枯槁詎同巢樹叟過從  
俠少轉激昂偶值窮途偏抖擻閒身山水足盤桓

懷天地等長久太丘廣大多交遊嗣宗玄遠絕臧否  
屋裏時看處士梅門前愛植先生柳喜瞻紫氣燁生  
稍何必仙方後繫肘古椿八千歲爲春今之八十方  
始壽

壽楊去奢七十

君家子雲有玄草君亦著書窮且老但令姓字垂千  
秋眼前飛沈何足道忽聞今年政七十鬚髯飄飄昂  
骨立走筆爲君歌南山期君它日共作九老集



寓林集詩卷之二終

寓林集詩卷之三

武林黃汝亨其文著

五言律

春日溫允文吳用修過瑤山寺問病分得鐘字  
相憶經年別蕭疎客裏逢尚餘今日病莫問舊時容  
小語依玄箸孱軀仗短筇不知臨夜色聲渡梵王鐘

雙林過訪沈觀願先生

五畝高人宅蕭然似竹林因風過水曲撥棹入花陰  
拂塵塵容淨銜杯夜色深林文千載後曠世此抽簪

秋日小憇岫巖山房

窈窕此山中巖房一徑通飛泉時帶雨拂響坐臨風  
人靜禪初梵天高月政空淒清聊奏曲人世已鴻蒙  
七月望世傳藍門齋期亾者還家荆人顏色杳  
不可卽感泣作此

無復人如玉空餘月照軒惓然虛蕙悵杳矣說藍門  
短髮憐分鏡愁心託鼓盆大招哀可賦何處返離魂  
贈文池上人

支公成小隱一澗湛林西清嘯依猿洞枯禪似虎

半峯孤月近高樹白雲齊  
汝欲論玄意隔窻山鳥啼  
夜泊竇應酌蔡五岳舟中

落日行吟勑停舟  
野岸前樹迷三月柳  
水隔幾家煙鄉思  
夜來劇長歌酒後偏  
青天那可問極目但  
茫然

裴公洞

徙倚千峯上低回一竇中  
風霜依古塔禪寂尚裴公  
蘆葦衣裳共江流枕蓆通  
欲宣無漏秘若倩白雲封  
秋日爲茅薦卿生辰

與汝論交日扶光出海隅  
秋風幾蕭瑟世路載駟驅

短髮看雄劍愁心老唾壺莫談千歲事歡讌及須臾

落葉

徘徊入天際忽漫下階庭片片飛黃蝶亭亭隕落星  
乍辭風共舞頓委露俱零永夜流繁響蕭疎不易聽

探烏龍洞阻雨得十三元

徑自雲巖下幽將石竇捫蒼茫來雨氣點染上苔痕  
入座衣裳冷停驂木葉繁歸途政蕭索悵望酒盈尊

碧浪湖別梅季豹得三江

碧浪浮天際孤帆送客艤寒風偏淅淅征鴈獨雙雙

濁酒頻相勞，離心未易降。相思何以托，明月照蓬窗。  
朝雪分得十四寒

何處生虛白光，茫拂曙看飄。風霏玉屑映日上，欄干  
一壑深堪臥。羣峯秀可餐，牀頭杯酒在。莫問敵裘寒，  
得家嚴書聊爲撥悶。

亦知貧未病，索寞事多違。南郭時馮几，西山行採薇。  
玄將楊子僻，曲奏郢人稀。白髮容班舞，何嫌百結衣。  
元旦

燭花浮曙色，香靄散清塵。辭雪知年往，開梅報歲新。

佳時臨正旦勝事貼空春獨有親朋話依然似故人

春日耶溪公朗兩上人小集得寥字

虛巖流雨響細竹出風條臨檻花容滿分枝鳥韻嬌  
煩心歸物態靜理得僧寮相眎忘才辨山鐘起寂寥

劉幼安太史過訪靈山謬託蘭契小詩見懷

幽光分澗戶紫氣上雲關客到天涯外人宜丘壑間  
林深發孤嘯洞古貯清顏暫作金門避蘅茝一往還  
過無已上人經室

屋小擔花覆林深野竹青點頭惟石佛偏禮是蓮經

宿鳥閑窺戶流雲澹入扃可容俗士駕物外共沈冥  
秋夕餞戴晉仲兄弟還鄆郡

秋風澹木葉山鷲散階除雙劔去帆際一尊落照初  
玄亭遲問字白嶽好藏書行矣修途遠名成賦子虛  
送茅薦卿補官北上

出門翳秋色送子悵悲風下惠官猶小嗣宗途未窮  
龍驤終軼駕鳳翮已傷弓好駐西山日流光歲不同  
送陸拙之遊燕

微雲下山岫驅馬出郊原去國傷千里臨岐無一言



長歌寒易水孤劍老夷門肝膽向誰是秋風幾斷竟

哭吳韞翁師

招魂寧忍賦秋氣況悲哉不復吳公治誰憐賈誼才  
人瞻梁木壞曲奏水山哀倒盡生平淚悠悠杳夜臺

賦得少年臨水

媚珠波影耀映月水痕圓何粉凝飛沫韓香散去爨  
紫騮停雪岸青鳥竚雲關何當洛川上移向藐姑山  
蘇門先生招飲湖上吳允兆翁晉沈伯含黃白  
仲高深父俱集分得十三元

樹樹彫秋色山山濕雨痕  
蘭橈深逗渚菊酒淺浮尊  
一水衣帶合千秋詞賦存  
和歌慙郢里清嘯倚蘇門  
不寐

欹枕耿不寐長夜慘無歡  
種種髮千莖悠悠心百端  
蟲聲切虛牖燭影上危冠  
轉覺謀生拙方知涉世難  
輓錢憲副卓庵年伯

穀霧迷玄室淒風慘白楊  
遺光沉月照執法掩星芒  
流水曲千載雍門泣數行  
不堪將鶴唳瀟灑入松篁  
沈伯含招集賦得落照分飛字

半袖圓光薄中林暮色飛沉波開水鑑散綵作雲衣  
睥睨還疑驛馳驅未易揮西山遙見待不醉且無歸  
遲客暮矣喜劉生至快飲

踟躕客不至徒倚思爲狂忽爾鳴仙佩相將入醉鄉  
煙容和目送雪態逐心揚笑指巖間月亭亭樂未央  
哭門生郁君武

蚤世人憐汝愁心天喪予空餘千古意寥寂一牀書  
短屐青山斷疎扃夜月虛問奇人不見有淚獨潛如

其二

狂簡應存汝文章倍有神及門嗟此日自矚嘆斯人  
行矣河山邈傷哉慟哭新浮生聊爾爾天道詎堪論

讀吳仁仲年兄所志內行詩以悼之

與汝憐同病瑤縑不忍看悲風下木葉殘月墜欄杆  
案遠惟青史帷虛只黜冠鼓盆寧是達政苦有情難  
春來雨雪特甚予擁衰絰下帷璉水愴然有作  
飄飄紛雨雪孤棹下菰城回首白雲盡啼鳥三兩聲  
初驚千里夢彌痛九原情客路偏癸獨行行嘆此生  
吳允兆張異度吳用修溫允文夜集孝若齋中

分得歌字

不禁它鄉淚經春廢嘯歌故人來  
管水明月照山阿  
卜夜非杯酒論交是薜蘿  
相看今夕意青眼爲誰多  
用修邀集瑤山寺分得明字

青林披夕秀煙渚落霞明  
好鳥鳴高樹春風集友生  
坐移帆席影杯渡棹歌聲  
莫漫言歸去禪房夜更清  
自璉水寄別楊仲堅之官安城

春草陰成綠長林色送青  
驪駒不可詠在遠惜飄零  
黯黯茗溪水漫漫江上亭  
離心何以託千里有青萍

蓮池師說法南屏後還山詩以送之

曉日暉雲表微風倡石林闡茲無上法定彼有求心  
不識青山在空嗟赤水深嗒然投杖去爾我罷招尋  
靈隱寺遠上人薙髮別號石林詩以祝之

試作廬山想尋聲是遠公髮將千莖落心竟六時空  
高枕腫朧月虛窻遠近松可能持半偈不墜本師風  
立夏日贈別梅季豹之宣城

極浦迷春樹含峯起夏雲思盈添永晝緒亂重離羣  
古道黯相照玄言醉獨聞莫催溪上棹緩發爲畱君

病懷

作客病不已，閒房度日遲。  
檢書愁自廢，試藥苦相宜。  
夕檻桐陰覆，暗窻蕉影垂。  
百端誰共語，展轉寸心知。

其二

徙倚空齋午，蕭然寤屨聲。  
煙容霏寶篆，雨氣出茶鐺。  
陰度林叢重，風加枕席清。  
搖搖觀幻影，歸燕下雕楹。

其三

坐起臨明鏡，彫傷不耐看。  
玄心薄短鬢，墨色黯危冠。  
喪我將非故，含哀詎有驩。  
徘徊意何極，浩渺白雲端。

其四

日日惟高枕，羈心可奈何。  
長卿消渴甚，莊鳥苦吟多。  
淨檻林花落，疎櫺鳥雀過。  
無能駐流影，憔悴託巖阿。  
哭次兒茂積殤

鍾情緣我輩，窮慘值茲時。  
甫哭三年婦，重傷兩歲兒。  
哀絃淒絕響，玉樹杳無枝。  
形影空存我，沉憂未可知。

登秦駐山

東遊不可見，西望亦悠哉。  
亂鳥蒼溟合，遠天紅日開。  
雲間聊弭節，松際一登臺。  
萬古雄心盡，沙鷗自去來。



訪殷方叔隱士

有序

鴛湖之西有隱士焉曰殷方叔風雨一椽蓬蒿四  
壁作葆楮賦寂同楊子之玄續酒德頌醉解伯倫  
之妙埋姓名于藥草代耕耘以硯田門人戴生項  
生向余稱其爲人余獲啓扉見之竊竊然不能去  
也眷焉解維用述懷企

煙水停孤棹荒途得隱淪蓬蒿沒玄草風雨長青蘚  
賣藥還藏姓荷條不避人一丘空置汝吾欲老爲隣

雨中訪秋潭禪師

禪心湛秋水煙雨覓支公半偈竹林下片時香靄中  
靜綠棲忍草慧業啓詩筒小坐遲征楫溪流度午風

壽休寧汪先生九十先生之子爲秀州博士

少年矜說劍中歲好論文素業看玄鬢黃山臥白雲  
起家秦博士高世漢徵君莫以申公老安車自昔聞  
宿弁山法華寺

禪心寂疎雨山骨冷秋林假此蘧廬宿坐來丘壑深  
千峯青作黛一水澹生陰梵響將松落飄揚世外音  
聞沈中丞閩中量移感寄

政切伊人想驚聞事不平 聖朝非愛少衆口良揚  
清乍息中原戰難言城下盟東山容屐齒未許遂高  
情

過吳子野園居

悠然成小築野色在秋林荒徑披帷寂低牆覆席陰  
餐分叢菊秀照攬曲池深容與遲歸艇相宜世外心  
冬夜四明吳石父張成叔漳南吳翁晉雲間康  
季修輩集茅孝若齋中分得清字

霜風切林薄溪月澹堦楹勝客殊方集高譚中夜清

燭光分睥睨酒態出從橫  
驩恣同玄賞愁含是別情

山閣諸生小集

竹色開晴徑梅芬襲曉簾  
幽棲非道在小坐得心恬  
山笈通危磴雲冠上紫巖  
夜來春雨細石畔草纖纖

懷抑之司理

催芳春聿暮懷人書不來  
飛花渡流水啼鳥上高臺  
江漢眇難越浮沉浪自猜  
山空人語隔遲日冷莓苔

燭淚

不禁千行淚搖搖是夜殘  
絲垂方引蔓珠散忽成團

澣血仄疑熱摧心光欲寒因風下衫袖隨月墮闌干

賦得泉聲分雲字

深山人語絕林空時有聞淅淅下秋雨泠泠和暮雲  
鳴陰幽籟出切響梵音分欹枕橫自落相尋詎有垠

贈卜者陳生陳生亦善書

何必尋山澤蕭然在市塵君平心自遠揚子測俱玄  
拂筮通千緒開簾止百錢餘閒無俗事筆杪落雲烟

晚眺飛來

烟容滿叢薄夕色上山阿徙屐逗危石拳裳捫綠蘿

巖間下鳥語樹杪起樵歌歸路不可辨蒼茫松際過  
贈僧慧石

通靈薄天漢結秀起巖阿五色亦以異孤標不在多  
含煙青綴碧映水素成波說法應無語點頭意若何  
靈萱符壽爲胡三溟母夫人賦

靈氣通名草幽心靜北堂可知千歲老已遣百憂忘  
引日提金質披雲散紫芳滋蘭蔭高木倚栢傲嚴霜  
避暑山中賦得美人贈衣

一整元無暑片心自送涼飛將蟬翼薄密引兔絲長

月下翻生白風前忽有香只愁秋夜永腸斷搗衣裳

聞蟬

夏林陰夕樹空山噪暮蟬急響若有意繁音何惜然  
因風和比竹逐露下哀絃詎是聲聞障心清得小禪

悼能公

憐汝清虛意支淋骨不勝生來無壽相歸去有初乘  
幻影搖梁月禪心冷夜燈寥寥棲水曲空自傳高僧  
七夕訪崑山歸季思夜集

三載西湖別清容每憶君故人高酒會新爽挹秋雲

銀漢臨星渚，青山落斗文。  
巧逢今夜月，刺促惜離羣。  
賦得朝煙

黯澹衆星沒，氤氳一壑生。  
來岫青初泛，翳林綠未明。  
亭亭依日上，緲緲倚雲橫。  
凌晨薄高閣，流光映赤城。

秋夕與所知飲斷橋

斜月西泠渡，微寒上小舸。  
秋容一水泛，夜色兩峯高。  
倚檻垂長袖，登樓看寶刀。  
浮雲西北起，黯黯夢蒐勞。  
贈晦谷法師

海白風濤外，山青夜靄中。  
虛空名佛子，幽墨似愚公。



無字成三點沉心冥六通依微通慧日不復怯蠶叢

劉生訪山中

佳人自南國靜好到西山蘭蕪披長袖梅條曳小環  
倩妝花片片和語鳥關關坐遣風塵去相將貯玉顏

聞虎二首

亦有難平氣臨風恨恨深無能叫閭闔祇自撼山林  
雞肋心還戀羊腸力未任何時恢帝網長嘯一橫襟

其二

鸞鳳方棲寂牛羊欲下來風微起孤嶽日暮振高臺

毛羽誰相惜聲聞祇重猜會須摧百獸聊爾伏蒿萊  
邇音上人輩小集湖山分茲字

白閣坐無暑清流況在茲水山來共賞支許幸同時  
送論玄歸塵沉酣綠寫卮扶疎下小艇漠漠晚陰遲  
丹陽道中途賀伯闇行人頒詔下吳

短棹雲陽道秋林日氣清笑將遊子劔何似使臣旌  
燬室皇天意輪臺 聖主情君行看父老流涕幾沾  
纓

秦郵朝發逢菊喜而載之

九日政思家東籬一樹斜秋風搖蔓草芳徑有名花  
披素凌霜葉紆黃拂露華無煩悲岐路蕩漾上靈槎  
贈綾襪有懷

四月淮陽別相思奈爾何有緣偏繫足流淚欲凌波  
線線心還續針針跡恨多香塵飛不斷密意在山阿

其二

豈有風塵色攜來不忍看獨憐伊室遠方嘆路行難  
曳履將添暖和衣爲護寒秋來風雨惡點滴淚痕斑

其三

不奈窻前識寒風竦竦侵短長空自語尺寸幾經心  
夢去分鞋想悲來團扇吟青雲知不遠可許共登臨  
小集倩華館分得家字

夜色侵高館清輝挹麗華共憐人倚玉相結酒爲家  
舞曳霜初重香銷月半斜氤氲情未已帶醉理琵琶  
邱中過郝仲輿給諫

莫問年來事蕭蕭已二毛快呼燕市酒笑跡呂虔刀  
駿骨馳千里雞聲起四郊政須司諫草霜氣肅清朝  
舍吳仁仲

痼疾君無問烟霞意獨偏  
前魚寧有泣飛鳥自堪憐  
璧以連城重花因並蒂妍  
鍾情還我輩相眎每媿然

遊東岳檢道藏處

何處巖居叟深宮禮道君  
歲時三萬日道德五千文  
香篆交青靄松花散白雲  
幽尋聊一坐歸騎已斜曛

初夏送錢國維銓部罷官歸

可許心如水平難論事已非  
無端投杼下竟爾掛冠歸  
夜月涼初集夏林綠正肥  
不堪折河柳愁曳逐臣衣

看竹

此君久與別不意見長安氣忽開新爽情疑淡故歡  
因風絃寶瑟和月委朱欄相對忘賓主何妨竟夜看

送丘伯畏年丈廣文蘭溪

莫以仕不達還知道益尊清風拂蘭渚文雅肅橋門  
槍攘干戈裏雍容鼓瑟存龍蛇聊此蟄霄漢定飛翻

送姚允初年丈廣文嘉定

白下才名宿青氈詎足酬彈冠欣就日歸騎欲先秋  
進學先生解徵材大匠收兩都終賦草還作上林遊

送李晴原老師之任南粵

祖帳春明外依然是絳帷旬宣周岳伯文獻魯宗師  
瘴海清風拂珠崖化日披秋來蕭蕭氣元禮下車時

寄荅曹尊生民部潞河

鬱鬱胃懷事迢迢是潞河波濤日以橫風雨夜來多  
欲渡亡維楫憂傷有斧柯乃知巢許輩幽尚在山阿  
高都闔方上疏請兵訪之忽臥牀半痿矣爲之

一笑

不信封侯骨支離臥石牀片心雄短劍左肘曳垂楊  
歎地論兵法憂時檢藥方自非霍去病何以靖疆場

三河以下督餉山海關作

風雨三河上，淒清七月秋。  
馬蹄猶俠少，鴈影是邊洲。  
接塞白雲暝，遠山青霧浮。  
停驂一以望，戰色起刀頭。

歸自北平雨值唐美承使車

蕭瑟行秋雨，驅馳過使星。  
遂成旬日別，無限故人情。  
海色衣裳冷，邊聲匣劍鳴。  
相憐鄉思切，九月醉烏城。

宿碧雲寺

石徑餘清靄，琳宮護翠微。  
孤亭秋月下，半榻暮雲歸。  
桂馥林間集，泉聲竹裏飛。  
安禪吾亦適，虛白坐相依。



自香山入弘光寺

短屐回叢薄香林又一峯  
蜿蜒巖九曲屏障樹千松  
寶座函金粟圓光散紫容  
杳然人逕外廊舍冷疎鐘

臥佛寺

有娑羅樹

亦爲青山好無時不臥遊  
高陰琪樹午清響梵林秋  
寂寞全棲石虛空半枕流  
自然齊萬物吾欲夢莊周

飯隆恩寺與僧寬

香臺瞻古佛寶地證初禪  
淨色時看樹秋聲半入泉  
日中分一食言下諦三玄  
更喜山僧俊烟書乞素箋

獻縣逢陸纂父

分袂久成別，停車喜忽逢。  
相憐岐路客，尚帶病時容。  
香署故人在，青尊水部供。  
陸來自范光  
又易州著如何歸思切，  
霜橘洞庭濃。

新嘉驛亭

結陰深驛舍，卽與世喧分。  
小澗偏沉日，孤亭亦貯雲。  
藤蘿秋與寂，林響暮還聞。  
不覺移時坐，銜杯半入醺。

金山寺果公淨業庵是馮開之祭酒所題

江上架染地，山陰淨業庵。  
憑虛通杳靄，俯檻挹寒潭。

破衲流雲護殘經落月叅重來學士座玉板出香龕  
馬雲海山人送予瓜步作別

遞與故人別惟君惜遠征向風悲易集垂老感逾生  
日氣殘春浦江流急暮聲還心將近矚慘黯潤州城  
送馬健之材官從戎薊門因謁項江兩兵憲

長纓烈士氣短劍薊門裝蹀躞輕千里悲鳴向九方  
電光明漢月風力踐胡霜不惜金馬飾偏看意氣揚  
舟滯宿遷陳雲遠同年夜集

日日依沙渚黃河不可行愁聞春草綠幾見暮雲生

失路終湖海，諧心得弟兄。  
青尊將野吹，談宴夜彌清。

晚登嶧山

夙有東山想，車塵苦不閒。  
荒郊餘落日，流覽一開顏。  
只有牛羊下，都無鳥雀還。  
蒼茫千仞上，石壘與雲關。

移舟采蓮

扶搖停桂檝，旖旎攬荷裳。  
映日施新沐，臨風出曉妝。  
清光秋水泛，綺豔夏雲將。  
密坐時流盼，應憐荀令香。

雨宿楊子

偃仰扁舟臥，江天雨亦奇。  
霧橫山黛失，雪卷浪花移。

星漢迷遙渚，林烟織晚炊。無妨漁父妬，孤唱醉偏宜。  
秋夕泊姑茂，與門人鄭簡孺徐次孺小飲。

涉江遲夕艇，披徑得秋山。小澗芙蓉畔，孤亭烟霧間。  
林疎丹葉下，浦靜白雲還。奔走慙凡吏，銜杯鬢解顏。  
包彥平過訪鍾陵姝媿寂寞，卽事賦得二首。

茂樹棲玄觀，幽人寄野村。日高朝伏枕，雲冷晝扃門。  
亦有南州榻，能無北海尊。自憐官不韻，寥落勿重論。  
其二

十日全無雨，荒居郭外村。祇宜窺藥竈，未許快屠門。

世路岐堪惜交情淡自存臨邛千載後病渴是文園  
秋宿樊叅知園亭

投轄能畱客驅車遂入林水間清夕暑竹下得秋陰  
綺落雲霞色虛流蟀蟋音頓諧嵇阮好便欲解冠簪  
有懷

澹澹流江水翩翩下海鷗風光闌以遠雲影爲誰畱  
悟入蘇公偈歸依范蠡舟桃源有秦女爲語遲浮丘  
行縣喜雪待立春前二日

雪喜先春至人今卜歲豐祥光浮日上佳氣靄雲中

雞犬歸村落人烟出樹叢行遊良自勝巖谷亦花封  
宿池溪館見劉抑之懷李君實詩悵然作次韻  
書問三秋後詩縣一榻前江雲淒斷鴈霜樹寂寒蟬  
世路窮俱慟交情夢亦牽雞聲啼四野誰著祖生鞭

偶成

宇宙寬如許營營意未休嶮崎驚鳥道容與羨漁舟  
月色橫秋坂霞光上晚樓搖搖如可掇浮白一相酬  
與汪長康輩小飲清林館是日值予生辰

落日暮山紫荒林夜月清偶來成宴坐聊適旅人情

蓬鬢驚相視芳尊喜共傾年華難可駐隨地話長生  
朝行太湖山松下因懷顧桐栢年丈

凌晨上山坂數里列松陰日影浮空翠風濤澁妙音  
地疑三竺境客到九華林因憶鳴琴者泠泠愜遠心  
將入東林作

晴光朗崑岫烟靄泛林叢客路行無厭看山自不同  
徘徊匡阜下問訊虎溪東不斷蓮花水依微見遠公  
宿州壁間客有賦孤燭異鄉人次韻作

作客常苦夜燈前怯未雙自憐心寂寂相對影幢幢



紅淚流孤枕清光逗小窻所思人不見迢遞隔三江  
米仲詔招飲湛園同汪明文山人劉九畹同年

分得齊字

北地名園勝西山傑閣齊林叢迷石丈水曲度花溪  
爽氣朝臨笏清光夜映藜簪纓誰與易此境足幽棲

又

悠然書畫意次第入山園竹渚日沈綠松風不避喧  
長林窺遠志片石領清言無俟歌招隱求羊自到門

覲還辭朝

日近晨光動天高曙色寒馳驅來萬國呼拜擁干官  
未許虛前席何能不免冠聖恩寬斧鉞倚馬笑相看

朝發鄒縣

夜來微雨歇朝爽淨無氛片片青山出林林綠樹分  
啼花嬌鳥下踐草野麋羣何必鳧爲舄飄飄騎似雲  
別汪長康旬日喜再晤彭城

別路纔三舍思君已九秋忽傳飛舄至又喜接塵遊  
風日山川送烟霞海岱收

長康遊秦山來

暮春初月上政好

下楊州

玉版居

不淺淇園趣欣參玉版名可存林下氣何似世中情  
曉月窺簾白名香入夜清虛堂復何有爽吹和經聲

張園

逶迤南郭外曲徑到長林雨過分苔潤涼來逗竹深  
清吟頻佐酒靜夜一鳴琴此坐偶無事爲君開素襟

徐園

莫問南州榻荒園日掩扉山房元窈窕雲樹自霏微  
喜汝銜杯數憐余奏曲稀涼飈何足避製得芟荷衣

訪曹能始明刑署署在豫章城中後傍明湖香  
荷如幔而余以能始始得之

羅雀空廷尉官衙似草廬琴尊眞靜好車騎自清疏  
壁有驚人句牀餘散帙書但令心地寂遊宦亦瀟如

又

日夕江城裏不知池館佳涼風來水際爽氣落山厓  
杯自香荷泛音將比竹諧浮家君且適況復得清齋  
閒雲樓再晤能始

高樓有明月小坐得閒雲一帶青山下千帆白浪分

于隅憐共唱斟酌漸成醺來日又爲別秋江空憶君  
秋夜胡光六年丈招飲湖上偶感時事

明月照高樹澄湖蕩晚風秀看羣岫合醉喜一尊同  
雞肋人俱戀羊腸路未通可憐名下士咄咄但書空  
七夕前一日湖上微雨邀馮開之吳伯霖家倩  
德懋飲別楊仲堅侍御按吳分得風字

秋爽逢佳夕沖襟坐穆風水雲霏澹漠山雨集空濛  
微恨天河隔還欣煙棹同殷勤非爲酒驅馬遂吳東

題玉湖漁父圖爲周叔隱

傲矣五湖長悠然一葦航坐看雲上下行汨水激落  
竿拂珊瑚色窻虛明月光高眠都不羨清嶺起滄浪

夜行古蕩投佛慧寺

不堪塵鞅累杖策問名山溪術茫無所松蘿渺可攀  
煙霏疎火下雨骨澹雲間何處林空臥僧離已候關  
佛慧僧圓賦予易規隱字之取靈運山月隱半

况之句

度此名山裏輝輝月似規巖端深淺見雲際有無隨  
滯影畱名相舍光得靜姿大圓寧可握劫以託幽思

自禹杭入臨安訪樊明府

禹杭山下陟問徑古臨安萬竹陰方度羣峯秀可餐  
石宐蘇子臥琴擬宓生彈不勸看秋色松巖日未殘  
臨安再晤樊致虛進士

已成千里別又喜片時同色黯秋山裏情餘夕照中  
張燈上初月揮塵集清風莫謂它鄉客茱萸處處紅  
宿西目竹房

爲問山藏寺因過竹隱僧翠華紛几席雲氣下稜層  
函丈分初月巢經閣一燈坐深清籟寂相對得心澄

禮高峯塔次開之先生隱字

何事空山裏猶傳老宿名塔縣千嶂夕宗紹一燈明  
幻影歸幽壑玄風出化城欲開獅子吼滿地落松聲

活埋庵

峭壁空秋色中天朗夜臺誰能活似水可復死如灰  
翠拔羣峯駭泉飛萬壑哀休言神理遠飛錫夢中來

禮斷崖塔

千巖應不斷問訊斷巖師超忽孤峯頂崔巍百尺枝  
堂虛空瑣影樹老落寒姿若箇成龍象依然一鉢持



徑山看竹

竹色自可愛無如此徑深千秋寒玉立萬畝綠雲沉  
遠竄窺天人清光覆地陰泠泠秋響切到處奏嵇琴

輓梁慎亭大叅

梁故爲侍御

猶憶鍾陵夕清容醉裏看高臺臨月色華燭引雲冠  
世路驚三峽客身悲一棺批鱗疏幾上落葉萬山殘  
冬夕訪顧任卿廣文于桐鄉不值重蕭然之感  
暮靄餘荒徑寒風侵薄帷虛無窺道園清寂得人師  
水淺驚龍臥門閒嘆鳳題何人能問字宦拙似幽棲

吳門值楊仲堅按部作

記得涼秋別春風值此行  
桃花驄馬色竹葉故人情  
聖主多新政吾曹恥盛名  
顛毛看種種何以慰平生

北固喜張爾葆至

二月桃花岸紛紛客子舟  
西陵來幾日南望似三秋  
山色晴披秀江帆春送流  
自今玄論發千里快相酬  
吳載伯司城往在燕晤沈  
五陵齋中忽以改官  
共載入京見贈佳詩次韻爲答

蕭齋燕市別此別已經時涉世分萍水勞君入夢思

不平遊子劍無數落花詩一一風前看淋漓下酒卮  
朝發彭城北看雲

荒城初日上廣野曉雲平近樹綠全沒遠峯青半明  
非烟容若縮未雨意偏盈一望真無限漫漫何處生  
過滕縣有感

盡說棠陰好千秋一召公但看佳樹色頗似古人風  
去住豈天外悲歌此地中雍門應有淚齊瑟總難工  
賦得壁上酒瓢唐人題

一瓢飲亦樂所置嘆非空顧此家徒壁何從酒滿卮

伯倫空有頌北海客何爲斟酌原無量虛盈自有時

彭城過彭祖祠

茫茫亦何趣此老獨長年宇宙人推世滄桑水滄川  
大椿元上古朝槿亦初妍不信無生理荒祠澹暮烟

九日抑之兄邀同元素摩訶庵登高分得聲字  
愛此他鄉日偏宜兄弟情牽衣上高閣倚樹落秋聲

雲岫橫寒翠蘭卮泛夕英  
婁娑歸騎晚松際月華明

哭門人丁叔兼三首

叔兼是右武季子

天地何其慘家門一倍傷  
俊人俱不免吾子亦云亡

玉樹驚埋土金刀遂掩鋒何期還問字空有淚千行

其二

汝父生平氣千秋迥未孤悲風嘶老驥汗血矚名駒  
慘矣風流盡傷哉日月徂祝予腸已斷何以慰將雛

其三

鍾情緣我輩況復可憐人標格元超俗文章自有神  
汝生何不幸天道總無親執手嗟何自惟餘慟哭新  
一元旦作

四十九年非茫茫願已違自今銷舊業還復理初衣

仰屋憂方大看山遯欲肥行藏難自定白髮漸霏微  
送張武選肅之遠山陰

日日送行客爲君愁緒多寧無理舟楫只是慎風波  
到處看桃李還家有芰荷名山元在剡何必滅鳴珂

懷張爾葆兄弟二首

憶汝山陰道徘徊巖雪深幾人攜酒伴何處讀書林  
草閣玄堂寂金門跡易沈車塵紛未淨誰與暢幽襟

其二

頗有南來便如何片字無豈緣鵬翮折竟使鴈行孤

杏雨窺林細，蘭風入徑紆。門人紛載酒，憶汝獨踟蹰。  
潘華魯光祿貽楊詩以謝之

只有陳徐好，千秋縣榻心。似君今日贈，可入古人林。  
靜落孤琴韻，清移萬竹陰。寂寥楊子宅，惟此暢玄襟。  
避喧般若廬，萬都尉仲晦載酒相過。門人盧玄  
則亦至，分得憐字。

入林何所事，靜影自相憐。忽有客浮白，能將語送玄。  
淒清宣竹籟，澹漠引爐煙。但醉莫言去，猶堪樹下眠。  
摩訶庵問僧非幻逝久矣慨然有作

十年曾過此幻影與琴聲

幻亦善琴

偶爾問前事淒然嘆

往生惟餘晚松色不住暮蟬鳴多少冠紳客於中沒

寄名

僧鉉是非幻同衣出其遺詩覽之

開士不得見殘詩猶可尋清容已陳跡墨妙未彫心  
臨風一再詠縹緲韻香林猶似去年事松間相對吟

讀香山集

空庭過涼雨松下一高眠偶讀香山句清吟妙自然  
常時愛飲酒第一喜逃禪吾亦無它事從君結此緣



夏日同喻養初同年邀劉石間奉常飲三聖庵  
水亭上人探一籌俱得開字喜而有作

日落典不淺登臨水上臺  
幾林青靄集一片綠波來  
飲酒不辭醉探籌共得開  
晚風香自送荷氣泛霞杯  
又次奉常韻

共推林下飲移坐水亭幽  
典到不知夕涼來半似秋  
疎鐘清野寺叢樹秀河洲  
不減江南色能無一醉留  
雨中送鄔子遠爲七夕前一夕

旬日愁霖甚如何作遠遊  
不堪雨如淚可是空爲舟

此地嘆河漢來朝羨女牛呼童開斗酒今夕且淹留  
雨夕韓邃之王木仲載酒過訪

浙浙多風雨沉沉白晝昏何人窺竹徑載酒過衡門  
仰屋心如禱傷弓舌欲捫祇應催一醉世事豈堪論  
秋夕陳中湛父母邀同劉著泉年兄爲西郊之  
遊晚從慈明寺中歸

絕少朝參事偏空野外招秋林疎落葉日影薄晴郊  
小怯寒風峻全憑酒氣驕夜歸紆醉眼佛火數僧寮  
九日送張孟奇權關吳門時水部漉千秋張宿

甫俱奉差南還

辜負登高約，偏多惜別心。  
霜風淒北鴈，花氣黯東林。  
歡聚時難得，憂危日漸深。  
翩翩車馬去，空自托嵇琴。

九月雪後米君夢吳翁晉鄧遠遊沈碩生集李伯遠齋中分得銜字

秋光薄餘雪，夕靄散空街。  
良夜惜搖落，故人相與諾。  
身從閒裏乞，愁向酒中埋。  
但醉亦云適，誰能喻此懷。

張聖標見過小坐

日落北窻白，寒雲淨不飛。  
丈室坐來隱，譚言醉入微。

一諾千黃金梁楚流音徹末俗不可語但覺古人稀  
不寐

遙遙此長夜忽忽似無歸不遣雄心盡翻嫌酒力微  
雞聲繁委巷曙色啓寒扉高臥真無賴匡牀一振衣  
哭龔大行維新於長安禪房

龔生非自天天乃促其年四壁殘書卷一官無俸錢  
雲浮身外物萍散客中緣相向已無語空齋冷篆烟  
初度四首

在世有如此吾生何所爲自宜招隱日強說服官時

老至衰始覺憂來人不知牀頭一短劍入夜光離離

其二

少年不解事驅足卽風雲牢落羞時輩棲遲混物羣  
何緣遂得老於世竟無聞幸有長生酒高朋飲至醺

其三

人生不滿百流景隙中移覺是未可定知非亦已遲  
難持心似水易老鬢如絲乞得佳山水千秋計在斯

其四

十年一閱世漸漸覺非真何地能知命於今作學人

浮沈先後浪老少去來身獨是虛空觀青山處處新  
送李伯遠廣文之臨安四首

十上長安道棲遲此一官神龍能蠖屈霄漢且泥蟠  
攜取煙霞屐紛來不注冠翻經臺絕勝揮塵出雲端

其二

天目山原好人師世共尊文章驚鳳羽冠帶繞龍門  
九折巖無恙臨安山有九折巖是子瞻題千秋業自存高名誰不

羨桃李總無言

其三

日日銜杯酒如何賦別離看君躍馬去倘我避人時  
交態翻雲薄歌聲入徵悲從橫心未歇匡坐且刪詩

其四

莫以仕不達如君意自超名山稱吏隱大雅擅風騷  
萬壑松濤落孤峯雪色高門人爭乞句珠霧集霜臺

除夕

依依停遠想擾擾澗清塵顧此一夕裏中分百歲身  
交情窺覆雨世路積勞薪惟有梅花好春來自襲人

寓林集詩卷之三